


黃文獻集
補附錄

二



黃文獻集

附錄補遺

(二)

黃潛撰

黃文獻公集卷之二

七言古詩

可憐行

紅顏白面可憐子。杖藜飢走荒山裏。翠眉新婦雪色兒。掩袖嬌啼瘦如鬼。道傍朱門照霜戟。腸斷汝翁呼不起。金魚象笏供搏菹。紈袴終然愁餓死。春風秋月哀思多。嗟汝少年奈老何。

崑崙歌寄吾邱子行

翠鸞啼雲天四垂。花龍雙雙神姥歸。金僊憶君淚如水。昌陽落花青藥藥。曾城珠闕揚素氛。開明狺狺環九門。羲和走馬不待人。鯨魚吸海海生塵。若有人兮恨修阻。紫玉參差老鳳語。笑揮如意教雲舞。雲閒鶴雛生兩羽。歸來歸來勿蹉跎。秋風吹折玕琪柯。

梓山行贈桑生

昔聞山中采藥翁。問姓但指簷前桐。君家本以桑爲氏。胡不種桑翻種梓。桐君采藥不學醫。桑君學醫兼采詩。朝來索我歌梓山。使我開筆頻支頤。問君梓樹家何處。青山難尋夢中路。但見清風兩袖寬。詩筒戢戢多於樹。長歌短歌亦奚爲。坐看藥籠懸珠絲。種桑種梓俱有術。也應無術醫君癡。

采芝曲贈永嘉林道士

碧峯矗起三十六。老芝千年琢紅玉。帝遣仙人下采芝。迷花失石憺忘歸。忘歸幾載無消息。蟠桃積核高數尺。何日青牛駕爾還。肯念金華牧羊客。

金華山贈同遊者三十韻

杖藜初出城西門。萬株紅葉如雲屯。芙蓉峯前問行路。宛宛一線隨潺湲。水聲漸遠山漸近。弱蘿纖葛手所捫。須臾橫側變峯嶺。高岸忽復爲平原。細泉瀏瀏竹竿直。石樹駢立疑同根。剝金敗碧逢廢刹。猶以第一名其軒。天明獨去弔遺迹。玉女委蛻空丘壠。樓居西起望明滅。石扉呀若山之樊。罅幽穴險徑沮洳。膝行匍匐不得奔。割觀崖广架寥泬。雙龍遶靈蟠。蜿蜒紛綸怪狀滿巖腹。熊虎踞伏鸞鳳翥。其餘瑣細無不有。形求像索難具言。前趨林麓卻下隄。俯矚九地窮涯垠。青枝翠羽不復辯。但聽風水聲喧喧。高燒松炬度其背。珠箔忽隨華燈繁。聳身上出指絕頂。碧桐高下彌山園。遙穿蓬艾踢雲雨。險艱從此不易論。秋毫細路莫容足。下瞰不測傍無藩。怪藤如鉤草如劍。舉首仰歎愁攀援。山翁顧之笑引臂。前牽後接猴與猿。馳坑跨谷欹側過。背汗喘息逾魚燔。陰沈古洞闕星日。雖有寒暑無朝昏。卻行左轉復深入。愈覺慄慄搖心魂。珠纓縹渺現滿月。稽首大士天人尊。拂衣徑逐飛鳥下。青山出沒波濤翻。或云漢人隱身處。彷彿肩背餘苔痕。蛇蟠磬折又數里。龜巖十丈開墉垣。夜歸草堂殿突兀。坐看雲月吐復吞。怡然攜手盡文士。頗覺筆下來源源。名山石室如可託。幸子歲晏來無諼。

送俞觀光

寒窗讀書吻政悲。坐聞剝啄走啓扉。衝風踢凍至者誰。俞子訪我繇剡溪。相逢把臂語移時。婦女驚笑羣兒疑。俗物病我不可醫。眼明見此珊瑚枝。朝來贈我天馬詩。忽然掉頭去莫羈。鼻端氣息干虹蜺。詎能折腰向小兒。文章技癢聊爾嬉。策勳聖處今毋遲。繫我愛子莫助之。臨岐躑躅徒嗟咨。

讀清江集

元祐儒臣煥星斗。後有作者非其偶。二龍三鳳何繽紛。況乃淵源魯中叟。適從塵編識英爽。想見世澤餘忠厚。長公平生二三策。大廷披腹驚羣后。風流斑斑仲與季。茅茨采椽絕丹黝。獨追古昔寓陽秋。稍挾疵瑕到瓊玖。卻蟠餘力歸賦詠。古硬清圓無不有。爰初人文啓河洛。下逮百氏分戶牖。空言可託匪末藝。巨筆待援須好手。典型未墜乃至今。吾生已幸何云後。青燈照夜雨如線。奧論微辭煩擊剖。追慕政復慚捧心。贊美胡能付鉗口。從遊起死不敢期。儻挹殘膏注空朽。

題李坦之詩卷

神仙中人世莫識。政以文章爲戲劇。李生也復可憐人。手種蟠桃待春色。山空歲寒誰念汝。青楓墮影霜露白。遠遊賦成一朝去。翠蓋雲旗暮何適。蓬萊烟霧秋冥冥。鄧君白鹿無消息。袖中驪珠三百顆。夜深勿近蛟龍宅。金華之山青矗天。山人看山忘歲年。黃精芝草幸可食。安得與子巢其閒。石牀醉聽松風眠。無爲長歌怨如哭。使汝惻愴凋朱顏。

甲辰清明日陪諸公入南山拜胡侍郎墓回汎舟湖中作

日終甲子斗直辰。持觴遠酌胡侯墳。兩漿趁鷗背城闔。四十有四同州人。半爲吳語如季真。湖窮岸出水陸分。舍舟登途指嶙峋。少年健走黃犢奔。或乃喝道驚春雲。老翁繭足仍後塵。解衣徑眠草爲茵。前趨一里趨廟門。杖藜不得辭微辛。嚴祠高居絕四鄰。傍爲一邱標石麟。升階鞠躬羞藻蘋。拜興有相祝有文。亦或稽首稱諸孫。歸途探幽挾荒榛。下睨塵土多蟲蟊。放舟催發無逡巡。勝賞莫許窮涯垠。開蓬列坐羅羶董。託名鄉飲無主賓。誰歟解事強討論。欲以窮達爲卑尊。美人今代王右軍。口吐秀句天葩芬。雁行拱立何紛紛。爭言我公詩絕倫。龐眉被褐兩山民。閉目宴坐方申申。艤舟黑亭鷗噪昏。晴楊吹花灑衣巾。裁詩紀實聊云云。慎勿浪傳來怒噴。

送傅主簿

吾聞上古之士。比屋皆可封。有材不必登王公。可憐衛青日尊貴。飛將自老風塵中。傅公平生經濟手。卻抱一經今白首。隨人騎馬著青衫。爽氣如虹射牛斗。出門大笑望長安。長安萬里行路難。行路難。知奈何。贈君一杯酒。請公聽我歌。崑崙之山兮高巍巍。黃河之水兮清有時。洛陽少年休太息。東山謝公來未遲。燕昭之事不足云。陛下聖德如華助。願公功成名遂身早退。魯連小兒能笑人。

茗溪風雨中章德茂同泛

黑風翻江白雨傾。檣欹柁側斷人行。此時惟我與章子。孤舟蕩漾烟波裏。兼葭蒼蒼楊柳黃。浩歌擊舷與

彌長。翩然一葉恣掀舞。青山白塔頻低昂。朝過城南暮城北。舟人問我將誰適。章子掉頭作吳語。秋水夜來深幾尺。忽看大字標竹林。寺門對水仍陰陰。敲門見竹不見人。竹閒翠石何蕭森。迴舟少休雨如注。四顧冥茫但烟霧。魚驚龍躍吾不知。披蓑卻入菰蒲去。岸傍羣兒拍手呼。笑言狂客世所無。嗚呼古人今則無。後來視我知何如。爲君留此有聲畫。題作扁舟烟雨圖。

由苕溪出大湖抵陽羨十四韻

首陽山人餓至死。陶公乃爲飢所驅。大賢出處自有意。腐鼠何得疑鷄雛。誰初令我墮世網。久抱礫礪行崎嶇。今晨笑與親友別。烟波泱泱扁舟孤。穹天大澤合爲一。回睨人境茫如無。向來蟻聚安足戀。而取窘束同囚拘。暮投高館燈閃閃。坐談姬孔歌黃虞。是閒幸可容一息。孰與臣朔肩侏儒。汗顏俛首飽腥腐。咄子所樂非我娛。故人殷勤入我夢。云我作計陋且愚。此生通塞久自斷。豈憂一勺忘江湖。春風二月花蔽野。珊瑚玉樹唯空株。丈夫兒女各有事。爲君起坐生長吁。

次韻方子踐雪中見寄

前年江南雪一尺。腐儒共走誇三白。寧知有客臥欲僵。凍骨稜層撐鐵石。今年復此雪塞門。江湖無處浮清樽。野風蕭蕭日色死。看人射虎蒼山根。牛衣覆寒夜復夜。金石餘音慚慰藉。平生萬卷定安施。一紙送我當渠借。

題陵陽牟公紫陽方公詩卷

兩翁風流掃地無。文章光燄埋邱墟。紛紛小兒政疾走。安用佩玉飛長裾。憶昔登堂三十載。夢想時復瞻眉須。昆蟲閉關水返壑。孰使驪龍遺領珠。願言保此勿輕出。幸免兒輩相睢盱。

題大瀛海道院

丹山之山青崔嵬。隱居舊隱山之隈。千年土鼎爲誰出。深崖古像松聲哀。鴻飛天上爪在雪。過者莫睨君能來。想當月斧乍揮霍。奔走屬役皆仙才。卷藏瀛海歸一粟。顧盼瞬息生風雷。森然幻有啓神界。白日照耀金銀臺。昔聞使者茲入海。樓船烟霧何時迴。君其置此勿復念。少須碧水揚黃埃。九重螭護陛下聖。方士未易誇蓬萊。琳宮貝闕長望幸。天高海闊心悠哉。

陽山昱上人訪予吳門寓舍求爲湘竹詩予辭以未見竹上人不遠六十里自山中舁其竹而來好事有如此者欣然爲賦長句

道人來自陽山麓。手攜舊種千竿竹。小裁方斛不盈尺。中有瀟湘江一曲。未信天工能爾奇。不知地脈從誰縮。晴窗脩脩散烟霧。眼底森然立羣玉。豈期我乃累此君。蒙犯風埃走塵俗。故山方遠重愁絕。新句未成慚迫促。黃岡之產大中椽。政用材美剝其腹。願言保此終天年。歲莫山中伴幽獨。

杭州送兒姪歸里

空江月滿潮聲怒。二兒勇踏潮頭去。故園天末渺予懷。夢中識汝歸時路。起向江樓遙望汝。江上青楓正霜露。涼風颯颯吹汝急。櫓搖背指龍山渡。翩然一葉舞中流。嗟汝童心得無懼。自我西遊歷三紀。舉目交

朋半新故。下車相揖何紛紛。白頭朝士猶徒步。元都觀裏舊桃花。見我重來能幾度。緬思疇昔仍念汝。倚徙闌干日將暮。前潮方斷後潮續。層波複浪無重數。魚龍出沒相後先。疾雷槌山雨如注。隔岸峯巒空復多。沙際冥茫但烟霧。計程知汝已登陸。息肩弛擔今何處。明朝過我三釜山。能勿徘徊起哀慕。近聞旱魃肆爲虐。殺吾手植千株樹。且須爲我語比鄰。莫遣牛羊上邱墓。

題松溪圖

獨騎瘦馬走赤日。忽對畫圖雙眼明。想見高人茅屋底。石牀臥聽松風聲。秋風漸高霜露白。松根茯苓已堪食。鬱紆遲暮祇自憐。卷圖還客三歎息。

題周鍊師雲崖圖

我本山中牧羊客。偶然失腳紅塵陌。矯首丹崖不可攀。但見層空暮雲碧。樓居仙人元不死。天長地久無消息。騎麟翳鳳者爲誰。道上相逢不相識。披圖示我舊游處。流水桃花尙春色。爲言白石久已爛。茯苓無復成琥珀。忽然長揖不肯住。飄若流星去無迹。若爲握手賦歸來。永與人閒風雨隔。

贈熊天瑞先輩

熊君南州山澤臞。敝衣不滿六尺軀。年丁七十氣尙竊。撥棄舟楫違江湖。塵埃掠面冰生鬚。北走梁宋至皇都。舉頭仰瞻天子居。姓名無由達公車。何王之門無長裾。君惟抱瑟王好竽。寒風蕭蕭雪塞廬。退從諸生詠唐虞。詩成篝燈手自書。字如凍蠅密復疏。食可無肉出無驢。爲我隄履來于于。曰予其歸無所須。一

言用比明月珠。我方守官櫟株拘。嗒然忘言據槁梧。童子穰穰環座隅。笑我腹笥太空虛。感君遠來增歎吁。愛莫助之將何如。翰林主人揭大夫。與君少若同隊魚。巖棲穴處多其徒。君歸而求宜有餘。長歌鼓缶聲鳴鳴。青天自高雲自孤。

番陽周節士歌

周君生長番君里。長身僂僂鬚仍美。師張先生業孔氏。夏螢冬雪頻繼晷。先生愛君不訖骹。君謂先生我知己。遭時戰伐多瘡痍。賊衆乘之作姦軌。郡檄先生俾一洗。先生慷慨爲之起。曰彼蚩蚩聚蜂蟻。冤渠本我家奴爾。我將笞之用折箠。披其角毛脫距觜。奴挾兵來速如鬼。反噬其主先生死。先生諸子俱幼稚。周君聞之失箸匕。曰古復讎蓋有禮。師長之讎視兄弟。我今必也書于士。走告郡府伏以俟。府公義之弗敢止。授以爰斯與弧矢。或云彼衆我無幾。盍募援兵爲表裏。君奮不顧行益駛。賈勇直前無與比。賊窮擲金計何詭。得金失賊墮其餌。亟取貪夫尸諸市。士氣復振賊乃靡。追奔逐北剿賊壘。迅雷不及掩其耳。一柵旣復衆柵毀。生致賊奴泊妻子。刳其心肺獻俎几。告于先生辭疊疊。凱旋公庭旗旖旎。散遣部伍歸耘耔。天戈耀日方南指。郡將效死弗拜跪。周君堂堂衆所恃。人咸謂君今可仕。細書降表僅尺紙。大哉公侯小刺史。君言我本不獲已。出爲吾師刷讎恥。罪人已得賊已弭。東村西落無荆杞。不義富貴寧飲水。公毋多談且休矣。閉門高臥肉生皤。白駒空谷餘四紀。歿葬金潭有廟祀。鄉人歲時擊羊豕。子噉來與胄子齒。踵門泣涕言如此。嗟君壯節甚奇偉。播茲歌詩侑哀誄。

送李憲使赴燕南分題得鳥飛曲

臺中樹枝上鳥無數。當年元只爲公來。今日從公卻飛去。趙北際。燕南垂。道傍綠樹多好枝。公之所憩鳥所依。公毋亟行鳥勿飛。問公此去何時歸。上林春深樹如織。公歸但聽鳥消息。

贈夏德頌

夏君懷抱何磊落。卜居不肯依城郭。丙舍新開近墓田。雪柏霜松翳邱壑。一朝興來不可遏。萬里黃塵走京洛。叩門遣我尺素書。僊玉駢珠相照灼。爲言家世本臞儒。餘力惟知事耕鑿。窮年甘與鹿豕遊。敢希鴻鵠翔寥廓。祇今遠來亦有意。求詩元不求官爵。華星秋月幸分輝。持向山家慰蕭索。我聞君言重太息。感君望我殊不薄。清時難選富才彥。笞鳳鞭鸞趁館閣。揮毫成風墨成雨。瑞錦披張分製作。一言引重力千鈞。青雲驥尾端堪託。顧我方爲句讀師。掇拾殘編味糟粕。坐隅童子日嘽嘽。平生雅意渾銷鑠。奚暇清吟發天巧。剪紅刻紫供嘲謔。君歸卉木尙餘春。況值新篁初解籜。傳家有書故可讀。有石可眠泉可酌。大勝山人來索價。低頭欲就微官縛。我雖齷齪坐無氈。有客如此良不惡。戲拈筆管和竈煤。爲君聊賦山中樂。

風樹吟爲李生作

返照入深林。牛羊在邱壟。風吹白楊樹。葉葉各自動。如何當此時。孤子萬里歸。有琴未成聲。遽欲絃吾詩。吾懶言詩子姑去。抱琴聽子風中樹。

題錢舜舉畫

鳥雀鷹鷂皆羽族。強之食乃弱之肉。兩雀亦分弱與強。一遭搏噬一高翔。畫師描貌勞意匠。詩人見畫齊惆悵。人間萬事無不然。雞蟲得失安足言。

題李氏白石山房

名山秀出鄱江曲。上有立石如立玉。尙書履聲忽已遠。隱者新居在盤谷。花開鳥鳴春晝永。白雲重重養喬木。夫君亦復稱其家。有書能藏且能讀。露鈔雪纂久愈富。何啻鄴侯三萬軸。山靈翕霍謹呵護。夜半虹光發深屋。引泉天井助芳潤。大勝吳儂飲山淥。我欲從之不可到。細字長書俄滿幅。毫分縷析極根柢。大義森然見條目。鄙人媿莫知所對。叩請安得留更僕。頗聞石洞闕遺音。龍門餘韻須君續。臨風傾詠寄綢繆。衰朽終期挹膏馥。

題張清夫心遠堂

吾聞古來賢達士。不擇山林與朝市。百年塵甕兩醺雞。鵬鷁逍遙俱可爾。夫君平生瀟灑意。俯睨軒裳猶敵屣。翩然一舸鱸魚鄉。歸來不待秋風起。忘言兀兀坐終日。天地古今齊一指。但見山高湖水深。青螺蕩漾銀盃裏。柴桑之人去我久。風味何妨略相似。神交冥寞雲海長。目送歸鴻眇千里。

題醉歌圖

翰林主人天上來。布帆不爲鱸魚開。江湖渺渺天一色。朝光暮色相徘徊。昔賢心賞餘勝處。祇有水竹無亭臺。碑材久已沒荊棘。屐齒不復留莓苔。後來視今猶視昔。今我不樂胡爲哉。大官馬湮遠莫致。鄰翁綠

蟻浮新醅。欣然一飲便終夕。鼻端氣息如雲雷。是閒別有一天地。不知何處爲蓬萊。迴觀方內海。一粟醅。雞塵甕何喧。應黃冠祕監太狂態。騎鯨供奉非仙才。揮毫政要眞學士。鋒車流水行相催。瑤池曲宴多雨露。歸歟酌彼黃金壘。

七言律詩

送孫君文判官

笑語匆匆似夢中。衣裳俄復判西風。殘蟬落日那堪別。瘦馬長途喜未窮。歲事已空南畝稼。歸期應老故山桐。興來尙有平生棹。載酒何時覓釣翁。

感舊

華屋山邱不可期。峴峩依舊綠參差。空懷下榻延徐孺。無復乘舟訪戴逵。日暮更聞鄰舍笛。歲寒賴有角弓詩。舊遊寂寞成今古。冷石秋花處處悲。

鳳凰山

滄海桑田事渺茫。行逢遺老色淒涼。爲言故國遊麋鹿。漫指空山號鳳凰。春盡綠莎迷輦道。雨多蒼莽上宮牆。遙知汴水東流畔。更有平蕪與夕陽。

開元宮

誰使藏舟一夕移。紅樓翠幕未全非。曾聞帝子乘鸞去。疑有仙人化鶴歸。烟逕月明瑤草歇。石壇露冷碧桃稀。赤闌橋畔多時立。閒看楊花作雪飛。

早起

漠漠晴簷散薄雲。獨搔短髮立清晨。春風入樹無行迹。曉月窺簾欲近人。旋覺新吟隨夢寐。不知清霧溼衣巾。何人正踏長安陌。想見看花拂面塵。

寄陳君采

江淹文采碧雲消。潘岳才華玉樹彫。後爾千年開鍵鑰。森然作者見風標。琪花夕日輝相並。金匱名山路未遙。賸欲傾心數還往。高期無使覺蕭條。

次韻答吳正傳

諸老彫零半九原。後來英發見蒼然。高標能復居人下。緩步猶須出我前。天馬爲誰生月窟。仙禽有日到芝田。論心待取同傾蓋。可使空回雪夜船。

寄葉審言

千里相思黃葉初。喜傳消息慰離居。姓名漫入山公啟。懷袖元無賈誼書。已分耕芸供賦斂。胡令汲引到樵漁。臨歧躑躅頻回首。風雨蕭蕭雁正疏。

獨立一作遣興

數盡飛花一愴然。壯心迢遞夕雲邊。十年人事空流水。二月風光已杜鵑。過眼青春寧復得。污人黃土絕堪憐。故園尙有平生約。可使蒼苔到石田。

卽事

南陌東阡草色齊。愔愔門巷客來稀。受風燕子輕相逐。著雨楊花溼更飛。綠樹無言春又盡。紅塵如霧手頻揮。浮生莽莽吾何計。獨立看雲竟落暉。

予與劉君師魯爲文字交十有四年而固未嘗相識也。茲過武林偶遂良覲有喜而賦。

邂逅神交十載餘。青楓落月幾愁予。何言此日同傾蓋。勝讀平生未見書。天上玉堂容可到。山中金匱得長虛。故多餘事宜商略。可待秋風怨索居。

九日

獨立憑高發興新。霜清露白復佳辰。綠樽在手不解醉。黃花滿頭應笑人。橋邊老僧幽期失。巖南居士新句頻。秋天此日併回首。鵝雁寄書愁未因。

次韻山南先生遣興二首

稍覺春風入剪裁。更無魂夢到塵埃。疏枝自送黃昏影。寶篆頻銷白晝灰。世態漸應隨日別。老懷可復向人開。擁爐坐聽蕭蕭雪。載酒攜琴也莫來。

蒲團兀坐久忘機。何暇重尋是與非。老雁長雲天渺渺。晚花寒蝶思依依。起看丹竈春無恙。欲試青鞋雪

未晞。鵬鷃逍遙端可耳。玉堂何必媿柴扉。

寄仇仁父先生

一官十載尙沈淪。門巷蕭蕭白屋貧。自有陶公爲社友。從呼杜老作詩人。兒曹故復輕前輩。僞步誰當出後塵。招隱詩成無處寄。暮雲凝碧坐愁神。

寄朱十八丈判官

金榜淒涼已十年。風流文采故依然。香山老去誰同社。栗里歸來尙有田。懷古坐看西日落。得春寧闕北枝偏。清泉白石多深趣。千載心期入近篇。

寄朱仲山

異縣關心朔雁飛。酒燈棋雨計頻違。寄書全覺稽康懶。入夢多疑李白非。黃葉閉門方寂寂。碧雲回首故依依。相逢賴有梅花約。試踢東風走翠微。

寄友人

繫舟一別雲水鄉。暮川葭菼空蒼蒼。漳濱臥病他年憶。渭北題詩春日長。蕪菁作花已爛熳。楊柳飛絮苦顛狂。聞道茯苓已堪斲。遲子青鞋經澗岡。

夏日漫書

枕上初殘柏子香。鳥聲簾外已斜陽。碧山過雨晴逾好。綠樹無風晚自涼。芳歲背人成荏苒。好詩和夢落

蒼茫求羊何不來三徑。門掩殘書滿石牀。

逢葉伯幾

水烟沙雨送歸航。楓葉蘆花已十霜。瑤曲天風春夢遠。墨池秋草故遊荒。碧峯又是新迴雁。白石依然舊化羊。一笑相逢卻成別。暮雲千里思茫茫。

宿賈氏山房

暝色蒼茫赴遠岑。獨追燈火下荒潯。寒沙細水通幽徑。修竹高楠走翠陰。草草悲歡中夜語。悠悠醒醉百年心。石霜烟月寒無寐。坐聽疏鐘出二林。

送友人之京

偶緣送遠接清遊。烟雨東城晚樹幽。離別自應多感慨。笑談未害各風流。百年芳草頻頻合。萬事孤雲故故浮。大華黃河入回首。春風愁絕李膺舟。

答友人

芝掌峯前一盃酒。別離歲晚遞相望。野梅如雪遙入眼。曉雁連天寒叫霜。閉門窮巷燈火冷。回首蒼山雲樹長。幾時抱被卻同宿。愧爾詩筒遠送將。

憶友人

無復高談慰索居。壯心零落竟何如。人間漫有金臺夢。身後誰傳玉枕書。半畝蒼苔埋壁地。一聲白雪斷